



# BOLETÍN OFICIAL DO PARLAMENTO DE GALICIA

Número 537

VIII legislatura

13 de setembro de 2011

Fascículo 3

## SUMARIO

(Versión electrónica en [www.parlamentodegalicia.es](http://www.parlamentodegalicia.es))

### 1. Procedementos de natureza normativa

#### 1.1 Leis e outras normas

##### 1.1.4. Convenios e acordos de cooperación con comunidades autónomas

Ratificación polo Parlamento de Galicia do Convenio de colaboración entre a Comunidade Autónoma de Galicia e outras comunidades autónomas para a coordinación das súas redes de centros de acollida á muller vítima de violencia de xénero [08/CCAA-0007 (65310)] [155990](#)

#### 1.2. Proxectos e proposicións de lei

##### 1.2.1. Proxectos de lei

Admisión a trámite, apertura do prazo de presentación de emendas e publicación do Proxecto de lei reguladora da política industrial de Galicia [- 08/PL-0034(70036)] [155990](#)

#### 1.3. Outras propostas de normas

##### 1.3.3. Propostas de convenios e acordos de cooperación con comunidades autónomas

- 08/CCAA-0009(70006)

Dirección Xeral de Relacións Institucionais e Parlamentarias  
Convenio de colaboración entre comunidades autónomas para o impulso de actuacións conxuntas para mellorar a oferta de transporte público a través da incorporación de sistemas tecnolóxicos [156058](#)

## 1. Procedementos de natureza normativa

### 1.1 Leis e outras normas

#### 1.1.4. Convenios e acordos de cooperación con comunidades autónomas

**Ratificación polo Parlamento de Galicia do Convenio de colaboración entre a Comunidade Autónoma de Galicia e outras comunidades autónomas para a coordinación das súas redes de centros de acollida á muller vítima de violencia de xénero [08/CCAA-0007 (65310)]**

A Mesa do Parlamento de Galicia, na reunión do 7 de xuño de 2011, admitiu a trámite o Convenio de colaboración entre a Comunidade Autónoma de Galicia e outras comunidades autónomas para a coordinación das súas redes de centros de acollida á muller vítima de violencia de xénero [08/CCAA-0007 (65310)] e acordou abrir un prazo dun mes desde a súa publicación no *Boletín Oficial do Parlamento de Galicia* para os efectos de que os grupos parlamentarios formularsen, se fose o caso, reparos.

O referido convenio foi publicado no *Boletín Oficial do Parlamento de Galicia* núm. 485, do 7 de xuño de 2011, e unha vez constatado que non se formularon reparos polos grupos parlamentarios, a Mesa, na reunión do 12 de setembro de 2011, acorda:

- 1.º Tomar coñecemento da non formulación de reparos.
- 2.º Comunicarlles a ratificación do convenio á Xunta de Galicia e aos grupos parlamentarios.
- 3.º Publicar o acordo no *Boletín Oficial do Parlamento de Galicia*.

Santiago de Compostela, 13 de setembro de 2011

Pilar Rojo Noguera  
Presidenta

## 1.2. Proxectos e proposicións de lei

### 1.2.1. Proxectos de lei

**Admisión a trámite, apertura do prazo de presentación de emendas e publicación do Proxecto de lei reguladora da política industrial de Galicia**

A Mesa do Parlamento, na reunión do día 12 de setembro de 2011, adoptou o seguinte acordo:

Admisión a trámite e apertura do prazo de presentación de emendas

- 08/PL-0034(70036)

Dirección Xeral de Relacións Institucionais e Parlamentarias  
Proxecto de lei reguladora da política industrial de Galicia

Examinado o devandito proxecto, e logo de verificar que reúne a documentación e os antecedentes previstos no artigo 111 do Regulamento, a Mesa, por unanimidade, acorda:

- 1.º Admitir a trámite o Proxecto de lei reguladora da política industrial de Galicia polo procedemento legislativo ordinario.
- 2.º Oír a Xunta de Portavoces para a súa asignación á Comisión e ordenar a súa publicación no *Boletín Oficial do Parlamento de Galicia*.
- 3.º Abrir o prazo regulamentario de quince días hábiles para a presentación de emendas, que comezará a contar a partir do día seguinte ao da publicación no *Boletín Oficial do Parlamento de Galicia*. O prazo remata o día 30 de setembro de 2011.


Santiago de Compostela, 13 de setembro de 2011

Pilar Rojo Noguera  
Presidenta




XUNTA DE GALICIA

CONSELLERÍA DE PRESIDENCIA,  
ADMINISTRACIÓNS PÚBLICAS  
E XUSTIZA  
Dirección Xeral de Relacións Institucionais e Parlamentarias



RS/mv



Para a súa tramitación polo Parlamento de Galicia achégolle o "**Proxecto de lei reguladora da política industrial de Galicia**", aprobado polo Consello da Xunta de Galicia na súa reunión do día 1 de setembro de 2011.

Asemade achégase a certificación expedida polo secretario do Consello co visto e praxe do Sr. Presidente da Xunta de Galicia, así como os documentos aos que se refire o artigo 111 do Regulamento da Cámara.

Santiago de Compostela, 9 de setembro de 2011

O director xeral de Relacións Institucionais e Parlamentarias

Roberto Castro García

Excma. Sra. Presidenta do Parlamento de Galicia

XUNTA DE GALICIA

ALFONSO RUEDA VALENZUELA, CONSELLEIRO DE  
PRESIDENCIA, ADMINISTRACIÓNS PÚBLICAS E XUSTIZA E  
SECRETARIO DO CONSELLO DA XUNTA DE GALICIA,



CERTIFICO:

Que o Consello da Xunta de Galicia na súa reunión do día un de setembro de  
dous mil once adoptou, entre outros, o seguinte Acordo:

“Aprobar o *Proxecto de lei reguladora da política industrial de Galicia*, e a súa  
remisión ao Parlamento de Galicia”

E para que conste asino esta certificación, co visto e praxe do Sr. Presidente, en  
Santiago de Compostela a un de setembro de dous mil once.

Vº. e Praxe  
O PRESIDENTE



XUNTA DE GALICIA

PROXECTO DE LEI REGULADORA DA POLÍTICA  
INDUSTRIAL DE GALICIA

ÍNDICE

ÍNDICE	2
EXPOSICIÓN DE MOTIVOS	5
TÍTULO I : DISPOSICIÓNS XERAIS	11
Artigo 1. Obxecto	11
Artigo 2. Definicións	12
Artigo 3. Ámbito de aplicación	14
Artigo 4. Fins	15
Artigo 5. Principios xerais	16
TÍTULO II: AXENTES IMPLICADOS NO DESEÑO E EXECUCIÓN DA POLÍTICA INDUSTRIAL	17
CAPÍTULO I: A ADMINISTRACIÓN XERAL DA COMUNIDADE AUTÓNOMA	17
Artigo 6. O Consello da Xunta de Galicia	17
Artigo 7. A Consellería competente en materia de industria	18
CAPÍTULO II: O INSTITUTO GALEGO DE PROMOCIÓN ECONÓMICA	19
Artigo 8. O Instituto Galego de Promoción Económica	19
CAPÍTULO III: AS ENTIDADES LOCAIS	20
Artigo 9. As Entidades locais galegas	20
CAPÍTULO IV : CONSELLO GALEGO DE INDUSTRIA	21
Artigo 10. Creación	21
Artigo 11. Natureza e réxime xurídico	22
Artigo 12. Fins e obxectivos	23
Artigo 13. Funcións	24
Artigo 14. Estrutura orgánica	25
Artigo 15. Composición e membros	26
CAPÍTULO V: OS CLUSTERS EMPRESARIAIS GALEGOS	27
Artigo 16. Creación	27
Artigo 17. Rexistro de Clústers Empresariais Galegos	28
Artigo 18. Funcións	29
Artigo 19. Axudas destinadas a clústers empresariais	30
TÍTULO III: O DESEÑO DA POLÍTICA INDUSTRIAL GALEGA	31
CAPÍTULO I: DISPOSICIÓNS XERAIS	31
Artigo 20. Avaliación previa do impacto das actuacións públicas no tecido industrial galego	31
Artigo 21. Estudio do impacto das actuacións públicas no tecido industrial Galego	32
CAPÍTULO II: PLANIFICACIÓN DA POLÍTICA	

# XUNTA DE GALICIA

INDUSTRIAL	33
Artigo 22. Instrumentos para a planificación da política industrial galega	33
SECCIÓN I: O PLAN DIRECTOR DA INDUSTRIA DE GALICIA	34
Artigo 23. Definición	34
Artigo 24. Fin e obxectivos	35
Artigo 25. Contido	36
Artigo 26. Elaboración e aprobación do Plan Director de la Industria de Galicia	37
Artigo 27. Modificación parcial del Plan Director da Industria de Galicia	38
SECCIÓN II: PROGRAMAS DE IMPULSO DA ACTIVIDADE INDUSTRIAL	39
Artigo 28. Definición	39
Artigo 29. Enumeración	40
Artigo 30. Fins e obxectivos dos Programas de Innovación	41
Artigo 31. Fins e obxectivos dos Programas de Internacionalización	42
Artigo 32. Fins e obxectivos dos Programas de mellora da Competitividade Industrial	43
Artigo 33. Contido dos Programas de Impulso da Actividade Industrial	44
Artigo 34. Procedemento de elaboración e aprobación dos Programas de Impulso da Actividade Industrial	45
Artigo 35. Procedemento de modificación dos Programas de Impulso da Actividad Industrial	46
TITULO IV: A EXECUCIÓN DA POLÍTICA INDUSTRIAL GALEGA	47
CAPÍTULO I: SIMPLIFICACIÓN ADMINISTRATIVA	47
Artigo 36. Limitación das autorizacións e xeralización do réxime de comunicación previa	47
Artigo 37. Comunicacions previas e declaracións responsables	48
CAPÍTULO II: OS PROXECTOS DE EXECUCIÓN DOS PROGRAMAS DA ACTIVIDADE INDUSTRIAL	49
Artigo 38. Execución dos Programas de Impulso da Actividade Industrial	49
Artigo 39. Normativa aplicable	50
CAPÍTULO III: OS PROXECTOS INDUSTRIAIS ESTRATÉXICOS	51

# XUNTA DE GALICIA

Artigo 40. Delimitación	51
Artigo 41. Procedimiento de declaración.	52
Artigo 42. Efectos da declaración dos Proxectos Industriais Estratéxicos.	54
DISPOSICIÓN ADICIONAL PRIMERA. Plan Director da Industria de Galicia	55
DISPOSICIÓN ADICIONAL SEGUNDA. Execución dos Programas de Impulso da Actividade Industrial	56
DISPOSICIÓN ADICIONAL TERCERA. - Non incremento do gasto	57
DISPOSICIÓN TRANSITORIA ÚNICA. Cumplimento dos requisitos para tener a consideración de Clústers Empresariais Galegos	58
DISPOSICIÓN DERROGATORIA.	59
DISPOSICIÓN FINAL PRIMEIRA. Modificación da Lei 9/2004, do 10 de agosto, de Seguridade Industrial de Galicia	60
DISPOSICIÓN FINAL SEGUNDA. Desenvolvemento Regulamentario	64
DISPOSICIÓN FINAL TERCEIRA. Entrada en vigor	65



## EXPOSICIÓN DE MOTIVOS

### I

Galicia non é allea á crise financeira que tivo o seu inicio no ano 2008 e donde o sector industrial, xerador de emprego e de riqueza, é un dos principais afectados.

Retomar a senda do crecemento, que tivo como principal aliado á demanda interna dun sector agora debilitado, e voltar a un novo ciclo de expansión e confianza, sen ser tarefa doada, sí debe ser o obxectivo e o propósito dunha sociedade comprometida co seu futuro, coa cohesión social e co benestar dos seus cidadáns.

A crise financeira puxo de manifesto certas debilidades estruturais dun sector industrial galego que, a pesar de todo, segue a estar chamado a formar parte da vangarda en xeración de ideas e en crecemento. Así, no ano 2010, a industria galega, incluíndo a súa rama enerxética, representou un 16,1% do PIB fronte ao 18,1% da zona euro. A dinamización da nosa economía esixe unha maior presenza da industria na actividade económica. Neste senso, e na procura da eficiencia dos escasos recursos, o impulso da innovación, da internacionalización e da competitividade amósanse como os puntos fundamentais nos que focalizar os esforzos de cara ao sector industrial.

Se ben, a innovación, os procesos de internacionalización e o espírito empresarial poden sempre xurdir dun xeito espontáneo, resulta cada vez máis evidente que sen un esforzo do conxunto da sociedade pola súa procura, terminan amosándose como cualidades/actividades escasas. As Administracións públicas non só deben evitar que as devanditas iniciativas se vexan freadas, se non que debe estimular a súa aparición e consolidación mediante a eliminación de barreiras legais, da información asimétrica, contribuir á redución dos custos de transacción e, fundamentalmente, promovendo e facilitando a anticipación ao cambio.

Innovación. A escasa intensidade tecnolóxica supón un lastre para a evolución industrial: nos anos 2009 e 2010 o investimento privado en I+D+i experimentou un retroceso do 8%. A globalización da economía e a entrada en escena de países emerxentes con estratexias agresivas baseadas en custos, especialmente nos laborais, obriga a buscar factores de competitividade alternativos baseados na calidade e localizados en actividades de carácter singular, de alto valor engadido e de elevada produtividade que obriga a un esforzo continuado en materia de innovación tecnolóxica e na integración na "sociedade da información". Este esforzo será garante do crecemento e contribuirá a eliminar a diferenza que actualmente existe entre Galicia e o resto de Europa.

## XUNTA DE GALICIA

A execución do Plan Galego de Investigación, Innovación e Crecemento 2011 - 2015, orientado entre outros aspectos ao fomento da innovación empresarial, á mellora dos centros e plataformas tecnolóxicas, de centros de competencia e de centros de excelencia científica constituirá unha ferramenta de partida indispensable para desenvolver e vertebrar políticas públicas neste ámbito.

Internacionalización. A reducida presenza do sector industrial galego no mercado exterior, tamén é unha quebra persistente na nosa economía donde a exportación de bens no ano 2010 representou o 13% do PIB, fronte ao 14,3% dos países da zona euro. Resulta esencial que na actual sociedade global de amplos fluxos comerciais as empresas galegas se sensibilicen sobre as oportunidades empresariais que proporciona a internacionalización e reorienten as súas estratexias poñendo maior énfase na busca de mercados exteriores, en especial naquelas áreas xeográficas de maior crecemento potencial ou de maior demanda. Con iso desenvolveranse as estratexias da competitividade e da produtividade factor este que, en Galicia, durante o período 2000 -2008 tan só creceu a un ritmo anual do 1,5%, lonxe do 2,2% da zona euro.

A importancia da internacionalización de alta competitividade é máis relevante no momento económico no que nos encontramos, cunha reducida demanda no mercado interno e cun alto grao de exposición á competencia de países emerxentes. A Xunta de Galicia considera ineludible a aposta polas actividades exportadoras que se leven a cabo especialmente desde o sector industrial; unha redefinición sopesada dos mercados obxectivos e unha ampliación da oferta de servizos de rápida implantación nos mercados.

Competitividade. Un 95,5% das empresas galegas son microempresas e máis da metade do total, concretamente o 51,3% son microempresas que non teñen asalariados. O sector industrial, cun comportamento algo máis favorable, non é alleo, sen embargo, a este panorama que debilita o investimento tecnolóxico, a implantación de estratexias de exportación/internacionalización ou o acceso a unhas condicións idóneas de financiamento, o que redundará, en definitiva, na ausencia de competitividade. Neste sentido resulta necesario favorecer as condicións para que mellore o tamaño das empresas industriais, especialmente as PEMEs, impulsando o seu crecemento, obxectivo que en parte pode vir dado por un apoio expreso á política de clústers e unha maior cooperación susceptible de desembocar en fusións ou concentracións empresariais de maior escala.

## II

Os obxectivos transversais de innovación, internacionalización e competitividade, aplicables a todos os ámbitos industriais, non son incompatibles co fomento de políticas concretadas en sectores específicos. Neste sentido a política industrial debe prestar especial atención - impulsando a súa excelencia - a aqueles subsectores estratéxicos que pola súa experiencia exportadora, pola existencia de empresas tractoras, por tradición empresarial ou polo seu potencial crecemento promoveron a pequena e mediana industria auxiliar mostrando súa capacidade de contribuír a un rápido progreso da economía galega, entre estes sectores o Plan Estratéxico de Galicia 2010-2014, Horizonte 2020, menciona á construción naval, ás enerxías renovables, á Automoción, ao téxtil, á transformación da madeira e á industria da pedra e das rochas ornamentais.

A innovación, a internacionalización e a competitividade empresarial, son, xunto a sostibilidade ambiental e a formación do capital humano os eixos sobre os que debe pivotar calquera política industrial, estes eixos requiren que as empresas, en especial as pequenas e medianas, dispoñan dun espazo normativo axeitado que lles permita formular expectativas razoables e duradeiras nas que desenvolver os seus proxectos de investimento. É misión da administración autonómica, e de calquera goberno, crear e manter un marco legal e de seguridade xurídica, capaz de definir un ámbito que permita e facilite o acceso á actividade empresarial en termos de igualdade de oportunidades e libre concorrència mantendo, un estímulo a movementos de carácter emprendedor que contribúan ao crecemento económico.

Son moitos os ámbitos normativos relevantes para o impulso da actividade industrial, entre outros están o laboral, o fiscal, o administrativo, o da administración de xustiza, o medio ambiental, o urbanístico e o da seguridade e a calidade industrial. A presente Lei non pretende ser un compendio de todas as materias citadas, algunhas de con escasa presenza no feixe de competencias autonómicas, e outras, como a seguridade e a calidade industrial, cunha normativa sectorial completa, adecuada e recentemente revisada.

A presente lei, en cumprimento do sinalado no artigo 3.1.m do Tratado da Comunidade Europea, dende o principio de subsidiariedade, trata de ofrecer un marco concreto, unha estratexia básica e unha resposta puntual a factores que inciden directamente no fortalecemento da competitividade da industria galega, para elo se adoptan mecanismos normativos, instrumentos de planificación, compromisos de impulso a políticas de internacionalización e innovación,

## XUNTA DE GALICIA

escenarios que favorecen a participación institucional a concertación e o diálogo social, con iso propíciase un entorno favorable á iniciativa e ao desenvolvemento empresarial. En definitiva, a Lei, dende a eficacia e a eficiencia duns recursos públicos, sempre escasos, trata de asumir os obxectivos da denominada Estratexia Europa 2020 sobre cuxos principais elementos e obxectivos clave chegou a un acordo o Consello de Europa do 26 de marzo de 2010 e onde a finalidade esencial da unión Europea, de Galicia tamén, é conseguir un crecemento intelixente, sostible e integrador.

A presente lei cabe concibila como pluridisciplinar pois tamén incide, sequera taxencialmente, en materia urbanística e inclusive, en virtude do sinalado nas disposicións finais, en materia tributaria pero como se expuxo é precisamente no "Fomento e planificación da actividade económica de Galicia", donde adquire maior rango e presenza.

Galicia, en virtude do sinalado no artigo 30.1 do seu Estatuto de Autonomía, de acordo coas bases e a ordenación da actividade económica e nos termos dispostos na Constitución, ostenta competencias exclusivas en materia de, [Un] Fomento e planificación da actividade económica. [Dous] Industria, sen prexuízo do que determinen as normas do Estado por diversas razóns.

O concepto, a competencia de "Fomento e planificación da actividade económica de Galicia" é o fundamento no que se apoia a lei para establecer as medidas de planificación/promoción industrial que contempla para Galicia, pautas que non resultan contrarias ás que corresponden ao Estado ao abeiro da súa competencia exclusiva sobre as "Bases e coordinación xeral da actividade económica", artigo 149.1.13 Constitución, senón que, destinadas especificamente a mellorar a estrutura da industria galega, son complementarias, concorrentes ou neutras coas estatais existentes non supoñendo as mesmas interferencia negativa ou distorsión coa ordenación xeral establecida, máis ben coadxuvantes.

Sobre estas bases e fundamentos Galicia, unha vez máis, avanza no uso da planificación rexional como instrumento de política industrial co fin de establecer unha estratexia integradora orientada a unha dirección sólida a favor do desenvolvemento industrial galego garantindo a eficacia dos seus recursos económicos a coherencia de actuacións en distintos ámbitos e establecendo un marco que favoreza a complementariedade das accións públicas e privadas.

III

A parte dispositiva da Lei estrutúrase en catro Títulos, a parte final inclúe tres disposicións adicionais, unha disposición transitoria, unha disposición derogatoria e tres disposicións finais.

No Título I “Disposicións xerais” delimitase o obxecto e ámbito da lei e fixéanse os seus fins e principios xerais.

No Título II “Axentes implicados no deseño e execución da política industrial” individúase os actores que interveñen na política industrial galega (a Administración Xeral da Comunidade Autónoma, o Instituto Galego de Promoción Económica, as Entidades locais galegas, o Consello Galego de Industria que se crea pola presente Lei e os clúster empresariais que por primeira vez con esta norma gozan dun recoñecemento e regulación legal) e defínense as súas funcións neste ámbito.

O Título III “Deseño da política industrial galega” consta de tres capítulos: no primeiro, créanse dous instrumentos para garantir a eficacia e eficiencia das actuacións públicas a “Avaliación previa do impacto das actuacións públicas no tecido industrial galego” e o “Estudo do impacto das actuacións públicas no tecido industrial galego”; no segundo, disciplínanse os instrumentos para a planificación da política industrial galega o “Plan Directo da Industria de Galicia” e os seus desenvolvementos, os “Programas de impulso da actividade industrial”.

O Título IV “Execución da política industrial galega” céntrase, esencialmente, en regular os proxectos de execución dos programas de impulso da actividade industrial e contempla a figura dos proxectos industriais estratéxicos, destinada a captar inversións relevantes que melloren o tecido industrial galego.

As Disposicións Adicionais adócanse a: fixar o prazo para a presentación do Plan Director da Industria de Galicia; regular a determinados aspectos da execución dos Programas de Impulso da Actividade Industrial e impedir que a constitución e funcionamento do Consello Galego de Industria supoña maior gasto.

Coa disposición final primeira modifícase a Lei 9/2004, do 10 de agosto, de Seguridade Industrial de Galicia, para adecualala á nova regulación contida na lexislación básica estatal, esencialmente, na Lei 21/1992, do 16 de xullo, de Industria.

## XUNTA DE GALICIA

As disposicións finais segunda e terceira prevén o desenvolvemento regulamentario e a entrada en vigor da Lei, respectivamente.

## TÍTULO I

### DISPOSICIÓN XERAIS

#### Artigo 1. Obxecto

A presente Lei ten por obxecto, determinar os órganos e entidades do sector público autonómico competentes para a planificación e promoción da actividade industrial, disciplinar o réxime xurídico dos clúster en canto axentes do sector privado singularmente relevantes no ámbito da actividade industrial, e deseñar os instrumentos precisos para a eficaz e eficiente realización das actividades de *planificación e promoción* no ámbito das competencias que o Estatuto de Autonomía lle atribúe á Comunidade Autónoma de Galicia.

## Artigo 2. Definicións

A efectos da presente Lei, enténdese por:

a) Actividade industrial, aquela actividade dirixida á obtención, reparación, mantemento, transformación ou reutilización de produtos industriais, ao envasado e embalaxe, así como o aproveitamento, recuperación e eliminación de residuos ou subprodutos, calquera que sexa a natureza dos recursos e procesos técnicos utilizados.

Entre outras, considéranse actividades industriais: as actividades consistentes na transformación física, química ou biolóxica de substancias ou compoñentes en novos produtos e as que supoñan calquera modificación, renovación ou reconstrución substancial de artigos e produtos acabados ou semielaborados; as actividades das industrias extractivas e de produción e distribución de enerxía e auga; as actividades ambientais e de tratamento, eliminación, xestión e valorización de residuos; as actividades das industrias da construción; as actividades relacionadas coa distribución de bens e servizos a outros sectores da economía e as actividades de venda, aluguer, mantemento e reparación de maquinaria, equipos, material de transporte e outros bens tanxibles.

b) Instalación industrial, conxunto de aparellos, equipos, elementos e compoñentes asociados ás actividades industriais.

c) Empresa, toda entidade, independentemente da súa natureza e forma, que exerza unha actividade industrial.

d) Pequena empresa, aquela empresa que ocupa a menos de 50 persoas e cuxo volume de negocios anual ou cuxo balance xeral anual non supera os 10 millóns de euros.

e) Mediana empresa, aquela empresa que ocupa a menos de 250 persoas e cuxo volume de negocios anual non excede de 50 millóns de euros ou cuxo balance xeral anual non excede de 43 millóns de euros.

f) Clúster empresarial, organismo que vincula a diversas empresas, ou entidades vencelladas coas mesmas, coma centros de formación ou unidades de investigación públicas ou privadas, que opera nun determinado territorio e no ámbito dunha ou varias actividades industriais fortemente relacionadas entre si pola existencia de clientes, procesos, coñecementos ou tecnoloxías comúns.

É fin esencial destes organismos colaborar para lograr obxectivos comúns, nomeadamente: no desenvolvemento de proxectos que contribúan á creación, acumulación e difusión de coñecemento; na mellora da produtividade, a través dunha maior especialización e complementariedade entre as actividades dos seus asociados; na innovación a través da investigación conxunta e na promoción da visibilidade, importancia estratéxica e boa imaxe do seu ámbito.



## XUNTA DE GALICIA

g) Tecido industrial galego, o conxunto de empresas que operan na Comunidade Autónoma galega.

**Artigo 3. Ámbito de aplicación**

A presente Lei aplícase ás actividades da Administración Xeral da Comunidade Autónoma e dos entes do sector público autonómico con incidencia sobre o tecido industrial galego, en todo aquilo non previsto pola correspondente lexislación específica.

**Artigo 4. Fins**

Son fins da presente Lei :

- a) Crear un marco normativo axeitado para a planificación e execución das políticas industriais.
- b) Fomentar a creación e o desenvolvemento da actividade industrial
- c) Promover a mellora da competitividade da industria galega
- d) Estimular a calidade industrial das empresas.
- e) Favorecer a internacionalización e a atracción de inversións no tecido empresarial galego.
- f) Atender, en particular, as necesidades das pequenas e medianas empresas.
- g) Procurar a cohesión social e a creación de postos de traballo de calidade.
- h) Garantir a participación dos/as axentes económicos e sociais da Comunidade Autónoma na elaboración das políticas públicas sobre a actividade industrial.
- i) Fomentar a creación e desenvolvemento de clúster empresariais galegos.
- j) Potenciar a formación empresarial e laboral.
- k) Estimular e favorecer o autoemprego e o emprendemento empresarial.

**Artigo 5. Principios xerais**

A regulación contida na presente Lei atópase informada polos principios:

- a) De liberdade de establecemento para a instalación e modificación das actividades industriais.
- b) De avaliación da eficacia e eficiencia da asignación e emprego dos recursos públicos.
- c) De desenvolvemento sostible e utilización racional dos recursos naturais.
- d) De colaboración público-privada, interadministrativa e de concertación social para facilitar a consecución dos seus obxectivos.

**TITULO II**

**AXENTES IMPLICADOS NO DESEÑO E EXECUCIÓN  
DA POLÍTICA INDUSTRIAL**

**CAPÍTULO I  
A ADMINISTRACIÓN XERAL DA COMUNIDADE AUTÓNOMA**

**Artigo 6. O Consello da Xunta de Galicia**

1. O Consello da Xunta de Galicia é o órgano superior de planificación e execución da política industrial da Comunidade Autónoma de Galicia.

2. Correspóndelle ao Consello da Xuntade Galicia :

a) Aprobar as disposicións de carácter xeral en materia de planificación e execución da política industrial da Comunidade Autónoma de Galicia.

b) Aprobar o Plan Director da Industria de Galicia.

c) Aprobar a declaración dos Proxectos Industriais Estratéxicos e autorizar a súa implantación.

d) Establecer liñas de cooperación en materia de planificación e execución da política industrial coas demais Administracións públicas.

e) As demais funcións que lle outorgue a lexislación vixente.

**Artigo 7. A Consellería competente en materia de industria**

1. A Consellería competente en materia de industria é o órgano da Xunta de Galicia responsable de deseñar a planificación da actuación pública en apoio á industria, así como de executar as funcións públicas relativas á actividade e promoción industrial, sen prexuízo das competencias específicas que teñan atribuídas as demais consellerías.

2. Correspóndelle á Consellería competente en materia de industria:

a) Realizar as avaliacións previas de impacto das actuacións públicas no tecido industrial galego.

b) Elaborar o estudo do impacto das actuacións públicas no tecido industrial galego.

c) Elaborar e aprobar o Proxecto de Plan Director da Industria de Galicia, así como propor a súa modificación parcial.

d) Aprobar os Programas de Impulso da Actividade Industrial.

e) Propor a declaración dun investimento como Proxecto Industrial Estratéxico e propor a autorización de implantación do mesmo.

f) Informar os plans e programas que afecten de xeito relevante á actividade industrial, nomeadamente, os de proxección de redes de infraestruturas.

g) Informar a creación de áreas ou polígonos industriais que incidan de xeito relevante no tecido industrial galego, de acordo co que se estableza regulamentariamente.

h) Informar sobre a adopción de medidas de fomento da calidade e seguridade que afecten á actividade industrial.

i) As demais funcións que lle outorgue a lexislación vixente.

CAPÍTULO II

O INSTITUTO GALEGO DE PROMOCIÓN ECONÓMICA

**Artigo 8. O Instituto Galego de Promoción Económica**

1. Aos efectos desta Lei o Instituto Galego de Promoción Económica é a entidade pública instrumental da Xunta de Galicia que colabora na execución das funcións públicas relativas á actividade de promoción industrial, nomeadamente, no ámbito internacional.

2. Ademais das competencias que lle atribúa a súa lexislación específica; en particular, no eido da internacionalización, sen prexuízo das competencias específicas que teñan atribuídas os demais órganos e demais entes públicos instrumentais da Administración Xeral da Comunidade Autónoma, correspóndenlle ao Instituto Galego de Promoción Económica as seguintes funcións:

a) A realización de todas as actuacións que resulten necesarias para impulsar a difusión e promoción internacional das empresas galegas.

b) A prestación de servizos ás empresas galegas que teñan por obxecto a cooperación con elas en relación coas accións que emprendan no seu proceso de internacionalización.

c) O desenvolvemento de actividades e servizos de asesoramento en materia financeira e aseguramento de operacións de comercio internacional, co fin de mellorar a competitividade e a capacidade de penetración das empresas galegas nos mercados exteriores.

CAPÍTULO III

AS ENTIDADES LOCAIS

**Artigo 9. As Entidades locais galegas**

As Administracións locais galegas, con plena autonomía e baixo a súa propia responsabilidade, no marco do establecido na presente Lei, poderán desenvolver cantas actuacións estimen oportunas para a consecución dos fins enumerados no artigo 4.



CAPÍTULO IV

CONSELLO GALEGO DE INDUSTRIA

**Artigo 10. Creación**

Créase o Consello Galego de Industria como órgano de participación dos/das axentes públicos e privados implicados na planificación e execución da política industrial da Comunidade Autónoma e de asesoramento neste ámbito ao Consello da Xunta de Galicia e a Consellería competente en materia de industria.

**Artigo 11. Natureza e réxime xurídico**

1. O Consello Galego de Industria é un órgano colexiado no que participan organizacións representativas de intereses sociais, adscrito á Consellería competente en materia de industria que actúa con plena autonomía no exercicio das funcións que lle corresponden.

2. O Consello Galego de Industria réxese polo disposto nesta Lei, polo seu desenvolvemento regulamentario así como polas normas de réxime interno que aprobe o mesmo, no marco da lexislación básica e autonómica sobre órganos colexiados nos que participan organizacións representativas de intereses sociais.

**Artigo 12. Fins e obxectivos**

1. O Consello Galego de Industria constitúe o ámbito de intervención dos/das axentes públicos e privados implicados na planificación e execución da política industrial de Galicia e ten como fin permitir a cooperación e colaboración entre os mesmos.

2. O obxectivo esencial do Consello Galego de Industria é posibilitar a axeitada comunicación e transmisión de información entre as persoas membros para acadar, mediante un proceso construtivo de diálogo e deliberación, a formulación de propostas, informes e estudos tendentes a lograr unha mellor e máis acaída planificación e execución da política industrial galega.

**Artigo 13. Funcións**

O Consello Galego de Industria ten as seguintes funcións:

- a) Emitir informe sobre o anteproxecto do Plan Director da Industria de Galicia.
- b) Emitir informe sobre o Estudo do impacto das actuacións públicas no tecido industrial galego.
- c) Realizar propostas en relación cos instrumentos de planificación da política industrial galega tendentes, tanto a mantelos permanentemente actualizados e acordes coas necesidades do tecido industrial galego, como a mellorar a súa eficacia e eficiencia.
- d) Ditaminar sobre aquelas cuestións que lle consulte o Consello da Xunta de Galicia ou a Consellería competente en materia de industria.
- e) Elaborar estudos en materia de política industrial.
- f) Aquelas outras funcións que lle sexan atribuídas regulamentariamente.

**Artigo 14. Estrutura orgánica**

1. Os órganos do Consello Galego de Industria son o Pleno, a Presidencia e a Vicepresidencia.

2. O Consello Galego de Industria poderá constituír grupos de traballo, integrados polas persoas membros do mesmo e, se se estima preciso, por persoas expertas de recoñecido prestixio, para o desenvolvemento das súas funcións.

### **Artigo 15. Composición e membros**

1. A Presidencia do Consello Galego de Industria corresponderalle á persoa titular da Consellería competente en materia de industria.

2. A Vicepresidencia do Consello Galego da Industria corresponderalle á persoa titular da Dirección Xeral competente en materia de industria.

3. O Consello Galego de Industria estará integrado polas seguintes vogalías nomeadas pola persoa titular da Consellería competente en materia de industria:

a) Tres persoas coa categoría de Director Xeral, propostas pola Consellería competente en materia de industria.

b) Tres persoas coa categoría de Director Xeral, propostas polas Consellerías con competencias vinculadas á actividade industrial.

c) Tres persoas, propostas polas organizacións sindicais máis representativas de Galicia.

d) Tres persoas, propostas polas organizacións empresariais máis representativas de Galicia.

e) Tres persoas propostas do seguinte xeito: unha polas Entidades locais galegas a través da súa entidade asociativa mais representativa, unha polas corporacións de dereito público que disciplinen profesións vinculadas ao ámbito industrial e unha última polas institucións, públicas ou privadas, relacionadas co estudo e análise das políticas industriais.

4. A composición do Consello Galego de Industria procurará ser paritaria entre mulleres e homes.

## CAPÍTULO V

### OS CLUSTERS EMPRESARIAIS GALEGOS

#### **Artigo 16. Creación**

1. Os clúster constituiranse de acordo co establecido na lexislación de asociacións.

2. Para a súa inclusión no Rexistro de Clústers Empresariais Galegos, a efectos de poder ser entidades beneficiarias de axudas da administración autonómica, estes han de cumprir e acreditar, mediante a achega dos documentos que se establezan regulamentariamente, os seguintes requisitos:

a) A súa denominación incluírá a palabra "clúster" e as referencias ao ámbito territorial galego e á actividade industrial na que operar..

b) A súa configuración encaixará na definición contida no artigo 2 da presente Lei.

c) Non terán ánimo de lucro.

d) Os seus estatutos recollerán expresamente o compromiso das asociadas de colaborar activamente para lograr obxectivos comúns, nomeadamente: no desenvolvemento de proxectos que contribúan á, creación, acumulación e difusión de coñecemento; na mellora da produtividade, a través dunha maior especialización e complementariedade entre as actividades dos seus asociados; na innovación a través da investigación conxunta e na promoción da visibilidade, importancia estratéxica e boa imaxe do seu ámbito.

e) Presentarán un Plan Estratéxico de actuación, consonte ao que se estableza regulamentariamente.

### **Artigo 17. Rexistro de Clústers Empresariais Galegos**

1. Créase un Rexistro de Clústers Empresariais Galegos na Consellería competente en materia de industria.

2. Este Rexistro ten como funcións esenciais:

a) A inscrición como Clústers empresariais galegos daquelas entidades cuxas solicitudes sexan resoltas favorablemente, así como a cancelación de dita inscrición, ben a solicitude das entidades inscritas ou ben de oficio, sempre previa audiencia das mesmas, cando concorra algunha das causas regulamentariamente establecidas, nomeadamente, cando unha entidade deixe de reunir as circunstancias que xustificaron a súa inscrición ou cando incumpra as previsións contidas no seu Plan Estratéxico.

b) A garda e custodia da documentación entregada polas entidades inscritas, xunto ás actualizacións que se produzan.

c) A expedición da comunicación da inscrición e de calquera certificación sobre os datos e documentos inscritos no mesmo que resulten necesarios para a participación nas convocatorias de axudas.

3. Regulamentariamente, desenvolveranse os requisitos e o procedemento para a inscrición, modificación e baixa de entidades no Rexistro de Clúster Empresariais Galegos.



**Artigo 18. Funcións**

Os clústers empresariais galegos:

- a) Habilitarán recursos, capacidades e competencias que os seus asociados de xeito individual non poderían acadar.
- b) Potenciarán as relacións e interconexións entre os seus asociados máis alá das que habitualmente puideran ter no tráfico mercantil.
- c) Melloraran o atractivo do territorio no que actúan para o desenvolvemento futuro das actividades produtivas.

**Artigo 19. Axudas destinadas a clústers empresariais**

1. A concesión de axudas destinadas a clústers empresariais galegos terá en conta os seguintes criterios de valoración que se incluírán nas respectivas Ordes de convocatoria:

a) Que o clúster se encontre inscrito no Rexistro Especial de Agrupacións Empresariais Innovadoras.

b) A adecuación do Plan Estratéxico do clúster ao Plan Director da Industria de Galicia.

c) A actividade do clúster, en execución do seu Plan Estratéxico, realizada nos tres anos anteriores á convocatoria da respectiva axuda.

2. Na concesión de axudas destinadas a fomentar a creación de clúster empresariais galegos terase en conta, fundamentalmente, adecuación do proxecto de Plan Estratéxico do clúster ao Plan Director da Industria de Galicia.

**TITULO III**

**O DESEÑO DA POLÍTICA INDUSTRIAL GALEGA**

**CAPÍTULO I**

**DISPOSICIÓN XERAIS**

**Artigo 20. Avaliación previa do impacto das actuacións públicas no tecido industrial galego**

1. As propostas de plans, programas e proxectos e os proxectos de disposicións normativas con repercusión significativa na actividade industrial someteranse a análise pola Consellería competente en materia de industria co fin de avaliar o seu impacto na mesma, de acordo cos requisitos e procedemento que se determinen regulamentariamente.

2. Esta avaliación terá por obxecto, fundamentalmente:

- a) Asegurar o mantemento e a mellora da competitividade industrial, así como a creación de emprego de calidade.
- b) Garantir a coherencia normativa e planificadora.
- c) Evitar a imposición de cargas administrativas innecesarias ás pequenas e medianas empresas.

**Artigo 21. Estudo do impacto das actuacións públicas no tecido industrial Galego**

1. A Consellería competente en materia de industria realizará, bianualmente, un estudo dos efectos da actuación públicas con incidencia no tecido industrial galego, de acordo cos requisitos e procedemento que se determine regulamentariamente.

2. Este estudo terá por obxecto determinar:

a) O impacto, positivo ou negativo, das normas e dos plans, programas e proxectos na actividade industrial, en especial, dende o punto de vista da competitividade e da xeración de emprego de calidade.

b) Posibles actuacións de simplificación normativa, co fin de eliminar redundancias e antinomias, e de redución das cargas administrativas, especialmente para as pequenas e medianas empresas.

c) A necesidade de ditar normas para disciplinar cuestións de relevante interese non reguladas neste ámbito ou de implementar determinados plans, programas ou proxectos.

3. O devandito estudo, previo informe preceptivo do Consello Galego de Industria, será elevado ao Consello da Xunta para a súa ratificación.

CAPÍTULO II

PLANIFICACIÓN DA POLÍTICA INDUSTRIAL

**Artigo 22. Instrumentos para a planificación da política industrial galega**

Son instrumentos para a planificación da política industrial galega:

- a) O Plan Director da Industria de Galicia.
- b) Os Programas de Impulso da Actividade Industrial.

SECCIÓN I

O PLAN DIRECTOR DA INDUSTRIA DE GALICIA

**Artigo 23. Definición**

O Plan Director da Industria de Galicia é o documento no que se conteñen as liñas xerais e directrices básicas da política industrial galega e no que se sinalan os obxectivos e prioridades e sectoriais, a ter en conta na planificación da mesma, así como os criterios esenciais de intervención a observar na execución da política industrial galega.

**Artigo 24. Fin e obxectivos**

1. O Plan Director da Industria de Galicia ten como fin potenciar o desenvolvemento da actividade industrial, baixo parámetros de produtividade, competitividade e calidade, para contribuír ao establecemento dun modelo económico baseado no crecemento sostible, esencialmente, a través do uso racional, eficiente e proporcionado das materias e recursos naturais, que posibilite avanzar en termos de cohesión económica e social, mediante a creación de postos de traballo de calidade.

2. Constitúen obxectivos esenciais do Plan Director da Industria de Galicia:

a) Crear as condicións necesarias para a implantación e creación de empresas que rexeneren o tecido industrial galego, en particular de empresas vinculadas á tecnoloxía, o coñecemento e a creatividade.

b) Impulsar a innovación e desenvolvemento tecnolóxico. En especial, promover a I+D+i e as tecnoloxías que precisa a industria galega e favorecer a súa aplicación e a difusión dos seus resultados dentro do tecido industrial galego.

c) Fomentar á internacionalización das empresas galegas.

d) Lograr unha asignación eficiente dos recursos públicos, prestando especial atención a aqueles sectores mais relevantes para o desenvolvemento da Comunidade Autónoma.

e) Estimular a captación de inversións que supoñan un reforzo estrutural do tecido industrial de Galicia.

f) Fomentar a cooperación entre empresas.

g) Contribuír a potenciar o capital humano existente na Comunidade Autónoma, mediante o apoio á mellora da cualificación técnica e empresarial das persoas, o talento e a creatividade e a través da retención e captación de recursos humanos.

h) A creación e o mantemento de emprego de calidade.

**Artigo 25. Contido**

O Plan Director da Industria de Galicia terá o seguinte contido:

a) Unha análise da situación do tecido industrial galego no momento da súa elaboración e unha proxección da súa previsible evolución que, en todo caso, conlevará a realización dos mapas industrial e de infraestruturas de apoio á industria de Galicia.

b) A determinación das liñas xerais e directrices básicas da política industrial galega para o período de vixencia do Plan Director da Industria de Galicia que se fixe no mesmo, sinalando os obxectivos concretos e as prioridades, sectoriais, a ter en conta na elaboración da planificación de desenvolvemento do mesmo, constituída polos Programas de Impulso da Actividade Industrial, así como os criterios esenciais de intervención a observar na súa execución; todo isto consonte ao establecido nesta Lei e no seu desenvolvemento regulamentario.

c) A enumeración e descrición dos concretos Programas de Impulso da Actividade Industrial de desenvolvemento do Plan Director da Industria de Galicia a implementar. Na descrición de cada un deles reflectiranse: os obxectivos cuantitativos específicos a acadar; o tempo estimado para a consecución dos obxectivos fixados; os indicadores para o seguimento e avaliación do grado de cumprimento de ditos obxectivos; os responsables da execución e propóranse medidas ou accións concretas para levar a cabo dita execución.

d) A determinación dos procedementos de seguimento e avaliación do Plan Director da Industria de Galicia e dos Programas de Impulso da Actividade Industrial.

e) A descrición do marco económico-financeiro, na que se enumeran os investimentos necesarios para levar a cabo o Plan Director da Industria de Galicia, e o seu desglose por Programas de Impulso da Actividade Industrial e por Proxectos de Execución.

f) As demais previsións que se establezan regulamentariamente.



**Artigo 26. Elaboración e aprobación do Plan Director da Industria de Galicia**

1. Correspóndelle á Dirección xeral competente en materia de industria a redacción do anteproxecto de Plan Director da Industria de Galicia, tendo en conta as necesidades detectadas e os obxectivos fixados no Plan Galego de Investigación, que se atope en vigor, co fin de incrementar as sinerxías e evitar calquera tipo de duplicidade ou contradición.

2. Na redacción do anteproxecto de Plan Director da Industria de Galicia promoverase a colaboración das diferentes Consellerías da Xunta de Galicia, así como dos demais entes, organismos e institucións públicas e privadas relacionadas coa actividade industrial.

3. Sen perxuízo das funcións que lle corresponden ao Consello Económico e Social, a Dirección xeral remitirá o anteproxecto de Plan Director da Industria de Galicia ao Consello Galego de Industria para que este emita, no prazo que se estableza regulamentariamente, o correspondente informe e daralle, para o cumprimento do principio de transparencia administrativa, unha axeitada publicidade, de conformidade co que se estableza no desenvolvemento regulamentario da presente Lei, ao devandito anteproxecto para garantir a participación na súa elaboración de todas as persoas e grupos interesados.

4. Correspóndelle á persoa titular da Consellería competente en materia de industria a aprobación do Proxecto de Plan Director da Industria de Galicia.

5. A aprobación do Plan Director da Industria de Galicia correspóndelle ao Consello da Xunta de Galicia.

**Artigo 27. Modificación parcial do Plan Director da Industria de Galicia**

No caso de que durante a vixencia dun Plan Director da Industria de Galicia xurdan circunstancias imprevisibles e de grande impacto no tecido industrial galego, o Consello da Xunta, a proposta da Consellería competente en materia de industria, poderá aprobar a modificación parcial do mesmo, de acordo co procedemento simplificado que se determine regulamentariamente.

SECCIÓN II

PROGRAMAS DE IMPULSO DA ACTIVIDADE INDUSTRIAL

**Artigo 28. Definición**

Os Programas de Impulso da Actividade Industrial son instrumentos de carácter estratéxico nos que, no marco fixado polo Plan Director da Industria de Galicia, sinalase, en función de concretos fins a acadar, os obxectivos a alcanzar nun determinado prazo e se determinan os mecanismos e medios para a súa consecución, con indicación dos sistemas para avaliar a súa eficacia e eficiencia en tal tarefa.

**Artigo 29. Enumeración**

No Plan Director da Industria de Galicia, preverase a aprobación, entre outros, que se disciplinen regulamentariamente, dos seguintes programas: Programas de Innovación, Programas de Internacionalización e Programas de Mellora da Competitividade Industrial.

**Artigo 30. Fins e obxectivos dos Programas de Innovación**

1. Os Programas de Innovación terán como finalidade a innovación industrial, a incorporación de tecnoloxías avanzadas nas empresas de Galicia e a xeración de infraestruturas tecnolóxicas de utilización colectiva.

2. Con tal fin, nos Programas de Innovación, deseñaranse e estableceranse os Proxectos axeitados para acadar, entre outros que se poidan establecer regulamentariamente, os seguintes obxectivos:

a) Fomentar a introdución da innovación como un elemento esencial na actividade das empresas galegas; en especial, por unha banda, a través do estímulo ao desenvolvemento de proxectos de innovación polas mesmas, e, en particular, polas pequenas e medianas empresas, e, por outra banda, mediante o impulso de dinámicas de colaboración entre as empresas galegas para optimizar os investimentos en innovación.

b) Protexer o emprendemento corporativo como vía de crecemento a través da xeración de empresas dende a empresa.

c) Promover a formación no ámbito da xestión da innovación.

d) Impulsar a creación dunha rede de axentes facilitadores de propostas de proxectos colaborativos de I+D+i.

e) Fomentar a incorporación das TIC na actuación das empresas galegas.

### **Artigo 31. Fins e obxectivos dos Programas de Internacionalización**

1. Os Programas de Internacionalización terán como finalidade a introdución e/ou consolidación na competencia no ámbito internacional das empresas galegas e realización das adaptacións estruturais das mesmas que sexan precisas con tal fin.

2. Para iso, nos Programas de Internacionalización, deseñaranse e estableceranse os Proxectos axeitados para acadar, entre outros que se poidan establecer regulamentariamente, os seguintes obxectivos:

a) Facilitar ás empresas o coñecemento dos procesos de internacionalización empresarial, en particular as pequenas e medianas empresas, e asesoralas nos mesmos.

b) Garantir a capacitación dos cadros técnicos das empresas galegas no eido da internacionalización.

c) Apoiar á implantación de empresas galegas no exterior e a celebración de acordos de colaboración entre empresas galegas e estranxeiras.

d) Promover instrumentos financeiros para apoiar as empresas que teñan como obxectivo a súa internacionalización.

e) Mellorar o coñecemento e imaxe no exterior dos bens e servizos galegos.

f) Captar investimentos procedentes do exterior.

g) Garantir a coordinación de todas as entidades que operen no ámbito da internacionalización.

**Artigo 32. Fins e obxectivos dos Programas de Mellora da Competitividade Industrial**

1. Os Programas de Mellora da Competitividade Industrial terán como finalidade: estimular a xeración de valor polas empresas galegas; acadar un axeitado dimensionamento competitivo das empresas galegas; mellorar o posicionamento das empresas galegas nos mercados e por a disposición das mesmas as infraestruturas físicas ou tecnolóxicas que precisen.

2. Para iso, nos Programas de Mellora da Competitividade Industrial deseñaranse e estableceranse os Proxectos axeitados para acadar, entre outros que se poidan establecer regulamentariamente, os seguintes obxectivos:

a) A implantación de sistemas de calidade total e de certificacións nos eidos enerxético e medioambiental.

b) O desenvolvemento de servizos especializados para o apoio no ámbito da capacidade comercial, do marketing, da xestión de recursos humanos e da planificación da produción.

c) O apoio ao desenvolvemento de instrumentos de financiamento para as entidades que teñan por obxecto a promoción industrial e o desenvolvemento tecnolóxico.

d) A promoción, en sectores ou áreas de actividade emerxentes, ou insuficientemente dimensionados, dunha axeitada capacidade competitiva.

e) O desenvolvemento de infraestruturas físicas e ámbitos tecnolóxicos que possibiliten un axeitado desenvolvemento competitivo de proxectos industriais.

f) A especialización en actividades de maior demanda, con valor engadido e intensidade tecnolóxica.

**Artigo 33. Contido dos Programas de Impulso da Actividade Industrial**

Os Programas de Impulso da Actividade Industrial, consonte ao establecido nesta Lei, no seu desenvolvemento regulamentario e no Plan Director da Industria de Galicia, terán o seguinte contido:

- a) A determinación dos concretos fins a perseguir cos mesmos durante o seu período de vixencia, que se fixará neles.
- b) Os obxectivos a acadar establecidos de forma específica e cuantificada.
- c) Un estudo xustificativo sobre a necesidade e oportunidade do Programa en cuestión.
- d) Unha memoria de avaliación, con indicación precisa dos resultados obtidos coa execución de Programas anteriores que foran iguais ou similares.
- e) A enumeración e descrición detallada dos Proxectos que se empregarán para a execución e a determinación dos investimentos necesarios.
- f) O tempo estimado para a consecución de cada un dos obxectivos marcados.
- g) Os indicadores para o seguimento e avaliación do grado de cumprimento de ditos obxectivos.
- h) Os responsables da execución do respectivo Programa.
- i) Os procedementos de seguimento e avaliación.
- j) As demais previsións que se establezan regulamentariamente.



**Artigo 34. Procedemento de elaboración e aprobación dos Programas de Impulso da Actividade Industrial**

1. Correspóndelle á Dirección xeral competente en materia de industria a redacción dos proxectos de Programas de Impulso da Actividade Industrial, tendo en conta o disposto no Plan Director da Industria de Galicia.

2. Correspóndelle á persoa titular da Consellería competente en materia de industria a aprobación dos Programas de Impulso da Actividade Industrial.

**Artigo 35. Procedemento de modificación dos Programas de Impulso da Actividade Industrial**

No caso de que durante a vixencia dun Programa xurdan circunstancias imprevisibles e de grande impacto no tecido industrial galego, a proposta da Dirección xeral competente en materia de industria, a persoa titular da Consellería competente en materia de industria poderá aprobar a modificación parcial do mesmo, de acordo co procedemento simplificado que se determine regulamentariamente.

## TITULO IV

### A EXECUCIÓN DA POLÍTICA INDUSTRIAL GALEGA

#### CAPÍTULO I

##### SIMPLIFICACIÓN ADMINISTRATIVA

#### **Artigo 36. Limitación das autorizacións e xeneralización do réxime de comunicación previa**

1. Para o exercicio da actividade industrial unicamente poderá requirirse autorización administrativa previa cando resulte obrigado para o cumprimento de obrigacións derivadas da normativa comunitaria ou de tratados e convenios internacionais. Nestes supostos, o procedemento de tramitación será o máis sinxelo e áxil posible, facéndose uso sempre que sexa oportuno da solicitude de declaracións responsables.

2. Requirirase comunicación previa ou declaración responsable cando así se estableza nunha Lei por razóns de orde público, seguridade e saúde pública, seguridade e saúde no traballo ou protección no medio ambiente ou cando se estableza regulamentariamente para o cumprimento de obrigas derivadas da normativa comunitaria ou de tratados e convenios internacionais.

**Artigo 37. Comunicaci3ns previas e declaraci3ns responsables**

1. Aos efectos da presente Lei, ent3ndese por comunicaci3n previa o documento suscrito por unha persoa co que esta pon en coñecemento da Administraci3n auton3mica feitos ou elementos relativos ao exercicio dun dereito ou ao comezo dunha actividade, indicando os aspectos que poden condicionalos, e que se acompa3a, se procede, da documentaci3n necesaria para o seu cumprimento de conformidade co establecido pola normativa aplicable.

2. Aos efectos da presente Lei, ent3ndese por declaraci3n responsable o documento asinado no que unha persoa se identifica e declara, baixo a s3a responsabilidade, facendo constar de forma expresa, clara e precisa que cumpre os requisitos establecidos pola normativa vixente para acceder ao recoñecemento dun dereito ou facultade ou para o seu exercicio, que disp3n da correspondente documentaci3n acreditativa e que se compromete a manter o seu cumprimento durante a vixencia de devandito recoñecemento ou exercicio

## CAPÍTULO II

### OS PROXECTOS DE EXECUCIÓN DOS PROGRAMAS DE DA ACTIVIDADE INDUSTRIAL

#### **Artigo 38. Execución dos Programas de Impulso da Actividade Industrial**

Os Programas de Impulso da Actividade Industrial executaranse mediante Proxectos que poderán revestir a forma de concesión de subvencións, axudas, incentivos públicos ou outro tipo de medidas, de acordo co que se estableza regulamentariamente.

### **Artigo 39. Normativa aplicable**

1. Os Proxectos de execución dos Programas de Impulso da Actividade Industrial someteranse á normativa comunitaria en materia de defensa da competencia.

2. Os Proxectos aos que se refire o punto anterior, nos aspectos referentes ao réxime de axudas e subvencións da Administración da Comunidade Autónoma de Galicia, axustaranse ao establecido na normativa sobre subvencións públicas.

### CAPÍTULO III

#### OS PROXECTOS INDUSTRIAIS ESTRATÉXICOS

##### **Artigo 40. Delimitación**

1. Serán considerados Proxectos Industriais Estratéxicos aquelas propostas de investimento para a implantación ou ampliación dunha ou de varias instalacións industriais que teñan como resultado previsible unha expansión significativa do tecido industrial galego ou a consolidación do mesmo.

2. A efectos da declaración dunha proposta de investimento como Proxecto Industrial Estratéxico e para determinar a súa incidencia significativa no tecido industrial galego ou o grao de consolidación do mesmo terase en conta:

A) A súa importancia tecnolóxica.

B) O volume de investimento, que deberá ser como mínimo de 50 millóns de euros, o nivel de creación de emprego, que deberá ser superior a máis de 250 postos de traballo directos e a diversificación que se introduza no tecido industrial galego.

**Artigo 41. Procedemento de declaración.**

1. O procedemento para a declaración dunha proposta de investimento como Proxecto Industrial Estratéxico se iniciará a instancia de parte mediante solicitude da empresa interesada dirixida consellería competente en materia de industria achegando a seguinte documentación:

a) O proxecto de implantación ou ampliación da instalación industrial incluíndo a regulamentación detallada do uso pormenorizado, volume, características técnicas e funcionais, condicións de deseño e adaptación ao ambiente.

b) Memoria descritiva detallada das características técnicas das infraestruturas, dotacións ou instalacións obxecto do proxecto, así como do ámbito territorial afectado. Na devandita memoria incluíranse planos de situación e localización, a escala adecuada, das instalacións, así como determinación gráfica do trazado e das características dos accesos viarios, das redes de condución e distribución.

c) Unha memoria na que se xustifique:

- o xeito en que a proposta, de ser realizada, dará lugar a unha expansión significativa do tecido industrial galego ou a consolidación do mesmo.

- a viabilidade económico -financeira da actuación.

d) A idoneidade da localización elixida así como a relación do contido do proxecto co planeamento urbanístico vixente, coas directrices de ordenación do territorio mediante o correspondente análise de compatibilidade estratéxica e co plan de ordenación do litoral.

e) O documento ambiental que resulte esixible

f) Relación detallada dos inmobles necesarios afectados, describíndoos na forma que determina o artigo 17, da Lei de Expropiación Forzosa, de 16 de decembro de 1954.

2. Avaliada a documentación presentada a dirección xeral competente en materia de industria realizará a persoa titular da consellería proposta de admisión ou inadmisión a trámite da solicitude presentada

3. A instrución do procedemento de declaración corresponderá á dirección xeral competente en materia de industria, que recabará todos os informes que resulten precisos para avaliación do proxecto, nomeadamente os relativos á súa compatibilidade coa ordenación do territorio e o medio ambiente.

Cando o proxecto afecte a terreos que, de conformidade coa lexislación urbanística, deban ser clasificados como solo rústico de especial protección, se



esixirá o informe favorable do organismo que ostente a competencia sectorial por razón do correlativo valor obxecto de protección.

Para todos os actos e trámites os términos e prazos serán os mínimos previstos na súa normativa reguladora.

4.- Os proxectos a que se refire ou presente capítulo serán sometidos a un trámite de información pública de quince días mediante anuncio publicado no Diario Oficial de Galicia e seralles de aplicación a normativa en materia de avaliación ambiental. Para o caso de que o se trate de actividades suxeitas á avaliación de incidencia ambiental seguirase o procedemento abreviado considerándose a eses efectos que o proxecto se acomete directamente pola administración autonómica e que leva implícita a declaración de utilidade pública.

5. A persoa titular da consellería competente en materia de industria, a proposta da dirección xeral, remitirá ao concello correspondente do proxecto de que se trate, para que no prazo de quince días notifique a súa conformidade ou desconformidade co planeamento urbanístico en vigor.

6. No caso de desconformidade, o expediente seralle remitido á Consellería competente en materia de urbanismo e ordenación do territorio para a emisión de informe da Comisión Superior de Urbanismo de Galicia.

7- A persoa titular da Consellería competente en materia de industria elevará o expediente ao consello da Xunta, que decidirá se procede a declaración da proposta como Proxecto Industrial Estratéxico.

8- Aprobado o proxecto polo Consello da Xunta, a persoa titular da Consellería competente en materia de industria remitirá ao Concello un exemplar do proxecto de implantación ou ampliación da instalación industrial e será posible o inicio das obras.

**Artigo 42. Efectos da declaración dos Proxectos Industriais Estratéxicos.**

1.- A declaración dunha proposta de investimento como Proxecto Industrial Estratéxico autorizará a implantación do mesmo e ademais terá os seguintes efectos:

- a) A aprobación do proxecto de implantación ou ampliación da instalación industrial.
- b) A non suxeición á licenza urbanística municipal
- c) Declaración de utilidade pública e interese social do Proxecto Industrial Estratéxico, así como a necesidade e urxencia da ocupación dos bens e dereitos afectados, dos que o solicitante da declaración teña a condición de beneficiario da expropiación.
- d) Declaración de incidencia supramunicipal para os efectos previstos na presente lei.
- e) Declaración de urxencia ou excepcional interese público aos efectos previstos na presente lei.
- f) Declaración de prevaleza sobre outras utilidades públicas.
- g) Adxudicación directa de solo empresarial promovido polo Instituto Galego da Vivenda e do Solo ou empresas públicas participadas por este que teñan entre os seus obxectos a creación de solo empresarial, nas condicións establecidas pola normativa sectorial.
- h) Concesión de forma directa de subvencións de acordo co disposto na lexislación de subvencións.
- i) Imposición ou ampliación de servidume de paso para vías de acceso, liñas de transporte, e distribución de enerxía e canalizacións de líquidos ou gases, nos casos que sexa necesario, de conformidade coa normativa que as regule.

2.- As determinacións contidas nos Proxectos Industriais Estratéxicos terán forza vinculante para as administracións públicas e para os particulares e prevalecerán sobre as determinacións do planeamento urbanístico vixente.

**DISPOSICIÓN ADICIONAL PRIMEIRA. Plan Director da Industria de Galicia**

No prazo de seis meses dende a entrada en vigor desta Lei, a Dirección xeral competente en materia de industria elaborará un anteproxecto de Plan Director da Industria de Galicia.

**DISPOSICIÓN ADICIONAL SEGUNDA. Execución dos Programas de Impulso da Actividade Industrial**

Co propósito de ampliar o ámbito subxectivo dos Programas de Impulso da Actividade Industrial, as convocatorias de Proxectos de execución dos devanditos Programas poderán prever nas súas bases que as entidades que foran beneficiarias con anterioridade das subvencións, axudas ou incentivos públicos que constitúen os citados Proxectos, deban presentar unha memoria de desempeño das actividades que foron realizadas grazas ao apoio público obtivo nos tres anos anteriores á correspondente solicitude, a efectos da súa valoración no proceso de selección dos novos beneficiarios, de acordo co que se estableza nas ditas bases.

**DISPOSICIÓN ADICIONAL TERCEIRA.- Non incremento do gasto**

A constitución e posta en funcionamento do Consello Galego de Industria non xerará aumento dos créditos orzamentarios asignados á Consellería de adscrición.

**DISPOSICIÓN TRANSITORIA ÚNICA. Cumprimento dos requisitos para ter a consideración de Clúster Empresariais Galegos**

Aquelas entidades que foran beneficiarias de axudas en convocatorias anteriores á entrada en vigor da presente Lei ou aquelas que o poidan chegar a ser en virtude de convocatorias en curso orientadas a clúster empresariais da Consellería competente en materia de industria, non lles será de aplicación o contido no artigo 16ata 2 anos despois da entrada en vigor da presente Lei.

**DISPOSICIÓN DERROGATORIA.**

Quedan derogadas cantas outras disposicións de igual ou inferior rango se opoñan ó disposto nesta Lei.

**DISPOSICIÓN FINAL PRIMEIRA. Modificación da Lei 9/2004, do 10 de agosto, de Seguridade Industrial de Galicia**

A Lei 9/2004, do 10 de agosto, de Seguridade Industrial de Galicia, queda modificada nos seguintes termos:

1. Substitúense en todo o texto da Lei a expresión "instalación, ampliación e traslado de establecementos e instalacións industriais" por "instalación, modificación ou posta en funcionamento de establecementos e instalacións industriais".

2. Modifícase o artigo 1 apartado 2º, que queda redactado como sigue:

“ 2. O ámbito de aplicación da presente Lei esténdese a:

a) As actividades dirixidas á obtención, a reparación, o mantemento, a transformación ou a reutilización de produtos industriais, o envasado e a embalaxe, así como o aproveitamento, a recuperación e mais a eliminación de refugallos ou subprodutos, calquera que sexa a natureza dos recursos e procesos técnicos utilizados.

b) Os servizos de enxeñería, deseño, consultaría tecnolóxica e asistencia técnica directamente relacionados coas actividades industriais.

c) As instalacións, equipos, actividades, procesos e produtos industriais que empreguen ou incorporen elementos, mecanismos ou técnicas susceptibles de producir danos ou prexuízos ás persoas, flora, fauna, bens ou ao medio ambiente, derivados da actividade industrial ou da utilización, funcionamento e mantemento das instalacións ou equipos e da produción, uso ou consumo, almacenamento ou refugallos dos produtos industriais.

d) Rexeranse pola presente Lei, no non previsto na súa lexislación específica:

1. As actividades dirixidas a xerar, distribuír e subministrar a enerxía e produtos enerxéticos en todas as súas formas.

2. As actividades de investigación, aproveitamento e beneficio dos xacementos minerais e demais recursos xeolóxicos, calquera que fosen o seu orixe e estado físico.

3. As instalacións nucleares e radioactivas.

4. As industrias de fabricación de armas, explosivos e artigos de pirotecnia e cartucheira e, aquelas que se declaren de interese para a defensa nacional.

5. As industrias alimentarias, agrarias, pecuarias, forestais e pesqueiras.

6. As actividades industriais relacionadas co transporte e as telecomunicacións.



7. As actividades industriais relativas ao medicamento e a sanidade.
8. As actividades industriais relativas ao fomento da cultura”.

3. Modifícase a letra d) do artigo 2, que queda redactada como segue:

“d) Establecemento: enténdese por establecemento o conxunto de edificios, edificio, zona de este ou espazo aberto destinado ao exercicio dunha actividade industrial, incluíndo as infraestruturas e as instalacións que ten incorporadas. Inclúndose neste concepto ás empresas de servizos e entidades ou axentes en materia de seguridade e calidade industrial”.

4. Modifícanse as letras b) e c) do artigo 5, apartado 2º, que quedan redactados como segue:

- “b) Rexistro Industrial de Galicia.
- c) Rexistros de Instalacións Industriais”.

5. Modifícase o artigo 6, que queda redactado como segue:

“Artigo 6. Clasificación dos establecementos e instalacións industriais  
Aos efectos previstos na presente Lei, os establecementos e instalacións industriais clasifícanse en dous grupos:

a) Grupo I: establecementos e instalacións sometidos a autorización administrativa previa.

Neste grupo inclúense aqueles establecementos e instalacións industriais que para a súa instalación, modificación ou posta en funcionamento requiran autorización administrativa previa da Administración competente cando resulte obrigado para o cumprimento de obrigacións derivadas de instrumentos xurídicos internacionais e normas comunitarias.

b) Grupo II: establecementos e instalacións sometidos a declaración responsable ou comunicación ao órgano competente en materia de industria.

Neste grupo inclúense aqueles establecementos e instalacións industriais que para a súa instalación, modificación ou posta en funcionamento requiran dunha declaración responsable ou unha comunicación ao órgano competente en materia de industria”.

6. Modifícanse os apartados 2 e 3 do artigo 7, que quedan redactados como segue:

“2. Para a instalación, modificación ou a posta en funcionamento dos establecementos e das instalacións industriais do grupo II seguiranse os trámites e procedementos establecidos na normativa estatal ou autonómica na materia

que lles sexa de aplicación.

3. Para a instalación, modificación ou a posta en funcionamento dos establecementos e das instalacións industriais incluídos no grupo II da presente Lei, a Consellería competente en materia de industria entregará ao interesado un xustificante da presentación da declaración responsable ou comunicación e, se é o caso, da correspondente documentación, que lle servirá como acreditación do cumprimento das obrigacións administrativas, sen prexuízo das responsabilidades dos autores da documentación técnica e certificacións expedidas”.

7. Modifícase o artigo 10, que queda redactado como segue:

“Artigo 10. Rexistro Industrial de Galicia.

Os titulares das industrias, actividades, empresas de servizos e entidades ou axentes en materia de seguridade e calidade industrial que deban estar inscritas no Rexistro Industrial de Galicia, conforme ao establecido no regulamento do dito rexistro, comunicarán os seus datos á Consellería competente en materia de industria.

No caso de industrias, actividades, empresas de servizos e entidades ou axentes en materia de seguridade e calidade industrial sometidas a procedementos de autorización, declaración responsable ou comunicación, a inscrición no rexistro industrial de Galicia será realizada de oficio polo órgano competente a partir dos datos incluídos nos ditos procedementos”.

8. Modifícase o artigo 11, que queda redactado como segue:

“Artigo 11. Rexistros de instalacións industriais

Comunicaranse á Consellería competente en materia de industria os datos das instalacións industriais que por razón da normativa aplicable deban estar inscritas en rexistros específicos, nos termos establecidos en dita normativa”.

9. Engádense dúas letras ao artigo 33, apartado 3º:

“k) A inexactitude, falsidade ou omisión de calquera dato, ou manifestación, de carácter esencial, sobre o cumprimento dos requisitos esixidos sinalados na declaración responsable ou a comunicación aportada polos interesados.

l) A realización da actividade sen cumprir os requisitos esixidos ou sen ter realizado a comunicación ou a declaración responsable cando algunha de elas sexa preceptiva”.



XUNTA DE GALICIA

10. Suprímese a letra g) do apartado 4º do artigo 33.
11. Suprímese o Anexo I da Lei.

**DISPOSICIÓN FINAL SEGUNDA. Desenvolvemento regulamentario**

O Consello da Xunta, no prazo de catro meses dende a entrada en vigor desta Lei, elaborará un Decreto de desenvolvemento da mesma, dando audiencia por prazo dun mes no correspondente procedemento ás organizacións sindicais e empresariais intersectoriais galegas máis representativas.

**DISPOSICIÓN FINAL TERCEIRA. Entrada en vigor**

A presente Lei entrará en vigor ó día seguinte da súa publicación no *Diario Oficial de Galicia*.



Alfonso Rueda Valenzuela.

Conselleiro de Presidencia, Admón.  
Públicas e Xustiza.

### 1.3. Outras propostas de normas

#### 1.3.3. Propostas de convenios e acordos de cooperación con comunidades autónomas

A Mesa do Parlamento, na súa sesión do día 12 de setembro de 2011, adoptou o seguinte acordo:

Admisión a trámite

- 08/CCAA-0009(70006)

Dirección Xeral de Relacións Institucionais e Parlamentarias  
Convenio de colaboración entre comunidades autónomas para o impulso de actuacións conxuntas para mellorar a oferta de transporte público a través da incorporación de sistemas tecnolóxicos

1.º) Admitir a trámite e dispoñer a súa publicación no *Boletín Oficial do Parlamento de Galicia* do seguinte convenio de colaboración da Comunidade Autónoma da Galicia con outras comunidades autónomas para o

impulso de actuacións conxuntas para mellorar a oferta de transporte público a través da incorporación de sistemas tecnolóxicos.

2.º) Abrir un prazo dun mes que comezará a contar desde a publicación do convenio no *Boletín Oficial do Parlamento de Galicia* para os efectos de que poidan formularse por escrito reparos.

De non presentarse reparos no indicado prazo, entenderanse ratificados. De existir reparos, o convenio substanciarase na correspondente sesión plenaria para os efectos da súa ratificación, se é o caso, polo Pleno.

3.º) Comunicarlles este acordo aos grupos parlamentarios.

Santiago de Compostela, 13 de setembro de 2011

José Manuel Baltar Blanco



Vicepresidente 1.º



XUNTA DE GALICIA

CONSELLERÍA DE PRESIDENCIA,  
ADMINISTRACIÓNS PÚBLICAS  
E XUSTIZA

Dirección Xeral de Relacións Institucionais e Parlamentarias



A efectos do preceptuado no artigo 4.8 la Lei 1/1983, do 22 de febreiro, de normas reguladoras da Xunta e da súa presidencia, achégolle texto do **convenio de colaboración entre comunidades autónomas para o impulso de actuacións conxuntas para mellorar a oferta de transporte público a través da incorporación de sistemas tecnolóxicos.**

Inclúese copia compulsada da certificación do acordo de aprobación polo Consello da Xunta do 1/09/2011.

O que lle achego para o seu coñecemento e citados efectos.

Santiago de Compostela, 8 de setembro de 2011

O director xeral de Relacións Institucionais e Parlamentarias

Roberto Castro García

Excma. Sra. Presidenta do Parlamento de Galicia



XUNTA DE GALICIA

ALFONSO RUEDA VALENZUELA, CONSELLEIRO DE PRESIDENCIA,  
ADMINISTRACIÓNS PÚBLICAS E XUSTIZA E SECRETARIO DO  
CONSELLO DA XUNTA DE GALICIA,

CERTIFICO:

Que o Consello da Xunta de Galicia na súa reunión do un de setembro de dous mil  
once, adoptou, entre outros, o seguinte Acordo:

“Aprobar o Convenio de colaboración entre Comunidades Autónomas para o impulso  
de actuacións conxuntas para mellorar a oferta de transporte público a través da  
incorporación de sistemas tecnolóxicos.”

E para que conste asino a presente, co visto e prace do Sr. Presidente, en Santiago de  
Compostela, a un de setembro de dous mil once.

Vº. e Prace

O PRESIDENTE

**XUNTA DE GALICIA**  
CONSELLERÍA DE PRESIDENCIA,  
ADMINISTRACIÓNS PÚBLICAS E XUSTIZA  
SECRETARÍA XERAL

Santiago  
de  
Compostela

05 SET. 2011

Compulsado e conforme co orixinal

SECRETARÍA XERAL

O FUNCIONARIO





XUNTA DE GALICIA



## ANEXO

### CONVENIO DE COLABORACIÓN ENTRE COMUNIDADES AUTÓNOMAS PARA A PROMOCIÓN DE ACTUACIÓN CONXUNTAS PARA MELLORAR A OFERTA DE TRANSPORTE PÚBLICO A TRAVÉS DA INCORPORACIÓN DE SISTEMAS TECNOLÓXICOS

As Comunidades Autónomas asinantes con competencias en materia de transporte público intracomunitario.

## EXPOÑEN


A cooperación entre as Comunidades Autónomas é fundamental na nova etapa de desenvolvemento e consolidación do Estado Autonómico. Os cidadáns esixen esta colaboración horizontal para unha mellor prestación dos servizos de competencia autonómica, que supoña tamén unha xestión máis eficiente dos recursos.

O transporte público de persoas é, no conxunto das súas modalidades, un servizo esencial para a comunidade, tanto como garantía no exercicio dos dereitos básicos das persoas, como a mobilidade, como contribución ao desenvolvemento do conxunto de actividades económicas e a propia configuración das nosas cidades e vilas.

Desde a promulgación dos primeiros Estatuto de Autonomía, as Comunidades Autónomas asumiron como propias as competencias en materia de transporte público intracomunitario, realizando políticas de xestión e promoción orientadas a facilitar o desenvolvemento deste sector económico e, en relación singularmente co transporte público de persoas, promocionar aos usuarios un servizo adaptado ás súas necesidades específicas.


Singularmente, no ámbito do transporte de persoas, as novas tecnoloxías teñen atopado un marco no que facilitan a implantación e desenvolvemento de actuacións con gran potencial en áreas tales como a oferta de novos medios de pago, como ferramentas para a xestión de bonificacións nas tarifas, como en relación ao establecemento de novos sistemas de información aos usuarios en tempo real, fixación novos modos de control, etc.

Por todo isto, as Comunidades Autónomas asinantes consideran imprescindible establecer mecanismos de cooperación no citado ámbito que contribúan a mellorar a prestación de servizos públicos.





XUNTA DE GALICIA



De acordo co exposto considérase necesaria a sinatura do presente Convenio, baixo as seguintes.

## CLÁUSULAS

### PRIMEIRA - Obxecto

O obxecto deste convenio é establecer un marco de colaboración en materia de novas tecnoloxías aplicadas ao transporte público e, singularmente, a de persoas, en virtude da cal as Comunidades Autónomas firmantes se comprometen a adoptar diversas medidas para compartir información e colaborar no desenvolvemento de novos proxectos tecnolóxicos.

### SEGUNDA - Recursos obxecto da colaboración

Para a efectividade do Convenio, as Comunidades Autónomas asumen os seguintes compromisos:

1. Facilitar o resto das Comunidades Autónomas información sobres as aplicacións tecnolóxicas aplicadas ao transporte público das que sexan titulares, incluíndo os códigos necesarios para facilitar a súa implantación e posterior desenvolvemento.
2. Colaborar no desenvolvemento común da implantación de novas tecnoloxías nos servizos de transporte público.

Para a adecuada realización do indicado no apartado anterior, asúmese a recomendación de promover que o desenvolvemento das súas aplicacións tecnolóxicas orientadas ao servizo do transporte público se efectúe na medida do posible en software libre ou propietario, que permita que no seu caso poda chegar a ser compartido por diversas Comunidades Autónomas.

As Comunidades Autónomas, a través da Comisión sectorial que se establece na cláusula quinta elaborarán un inventario de aplicacións tecnolóxicas sobre as que se pode compartir información co resto das Comunidades Autónomas, incluíndo igualmente os requisitos de seguridade que, no seu caso, será preciso aplicar a fin de acceder a tal uso, respectando en todo caso as condicións pactadas por cada Comunidade Autónoma co seu proveedor tecnolóxico e a normativa vixente sobre protección de datos.

Igualmente, a través da referida Comisión sectorial comunicaranse reciprocamente aquelas aplicacións tecnolóxicas que cada Comunidade Autónoma teña previsto desenvolver a corto ou medio prazo, a fin de promover a adhesión de outras administracións no desenvolvemento de proxectos conxuntos.



**TERCEIRA – Outras liñas preferentes de actuación**

Simultaneamente a colaboración prevista nas estipulacións anteriores, co obxectivo de dar resposta coa mellor eficiencia as demandas sociais, as Comunidades Autónomas asinantes, asumen o compromiso de cooperar no desenvolvemento das súas respectivas actuacións no ámbito, polo menos, das seguintes liñas preferentes de actuación.

1. Coordinación, redacción e execución de estudos sobre a adopción de medidas comúns ou coordinadas para a maior eficiencia dos servizos de transporte a partir da incorporación de novos sistemas tecnolóxicos.
2. Establecemento de accións que faciliten a percepción por parte dos usuarios do transporte público como un sistema harmónico de cara o cidadán, independentemente dos modos utilizados ou do ámbito territorial no que se desenvolva a viaxe.
3. Análise e desenvolvemento de actuacións coordinadas ou comúns encamiñadas a mellorar a xestión dos servizos de transporte público.
4. Estudo e coordinación de actuacións comúns encamiñadas a fomentar o uso do transporte público mediante as tecnoloxías da información e das comunicacións.
5. Desenvolvemento das bases que permitan o recoñecemento de títulos de transporte de outras Comunidades Autónomas.
6. Establecemento das bases que permitan o intercambio de información entre sistemas de axuda a explotación (SAEs) de diferentes Comunidades Autónomas.
7. Establecemento das bases que permitan o intercambio de información entre sistemas de información de horarios, itinerarios, paradas, etc. de diferentes Comunidades Autónomas.

**CUARTA – Salvagarda das competencias autonómicas**

O presente Convenio de Colaboración asinase sen prexuízo da salvagarda das competencias exclusivas que cada unha das Comunidades Autónomas que o asinan ostentan en materia de transporte intracomunitario.

**QUINTA – Comisión sectorial de desenvolvemento e seguimento**

1. No prazo máximo de dous meses dende a comunicación as Corte Xerais, constituirase unha Comisión sectorial de desenvolvemento e seguimento, coa finalidade de dar cumprimento ao presente Convenio, formada por todas as



XUNTA DE GALICIA



Comunidades Autónomas asinantes a través dos seus representantes na materia.

2. Esta Comisión sectorial encargárase, ademais, de establecer os protocolos de actuación, que serán aprobados por as partes, e desenvolverán as pautas para a cesión de aplicacións tecnolóxicas entre Administracións.
3. A Comisión levará a cabo as iniciativas que se estimen oportunas para os efectos de trasladar a Administración Xeral do Estado as actuacións onde se estime procedente a súa concorrencia, instando a participación das Comunidades Autónomas nas mesmas, en todo caso.
4. Así mesmo, poderán constituírse Grupos de traballo para o desenvolvemento das actuacións mencionadas, integrados de forma paritaria por representantes das Comunidades Autónomas asinantes.

#### **SEXTA – Resolución de controversias**

1. A Comisión sectorial resolverá de común acordo as diverxencias que podan xurdir na aplicación e execución deste convenio.
2. As cuestións litixiosas que podan xurdir someteranse á xurisdición contencioso-administrativa, dada a natureza administrativa deste convenio.

#### **SÉTIMA – Prazo de vixencia**


Este Convenio entrará en vigor na data da súa sinatura e terá unha vixencia indefinida. En todo caso, os efectos non se producirán para cada unha das Comunidades Autónomas asinantes, ata o transcurso dos prazos que para a vixencia veñan estipulados polos seus Estatutos de Autonomía.

#### **OITAVA – Adhesión de outras Comunidades Autónomas**

As Comunidades Autónomas asinantes promoverán as accións necesarias para que o restos das Comunidades Autónomas que o desexen se adhiran ao presente Convenio.


#### **NOVENA – Extinción e modificación do Convenio.**

1. Convenio extinguirase polo común acordo entre as partes ou polo incumprimento das obrigas asumidas no mesmo.
2. Calquera das Comunidades Autónomas asinantes poderá promover a revisión dalgún dos termos do Convenio. As modificacións deberán incorporarse ao Convenio e ser subscritas por todas as partes.





XUNTA DE GALICIA



**DÉCIMA** – Separación do Convenio de Colaboración

1. Calquera das Comunidades Autónomas asinantes poderá separarse do presente Convenio previa comunicación, cunha antelación mínima de dous meses, as restantes por calquera medio que permita ter constancia da súa recepción.
2. En caso de separación de calquera das Comunidades Autónomas asinantes, o Convenio continuará en vigor respecto das restantes Comunidades Autónomas.

Por todo o exposto,

En proba de conformidade, o presente Convenio e asinado para que produza efectos con criterios de reciprocidade con todas as Comunidades Autónomas que, tendo competencias en materia de transporte intracomunitario, o suscriban.



## BOLETÍN OFICIAL DO PARLAMENTO DE GALICIA

Edición e subscricións: Servizo de Publicacións do Parlamento de Galicia.  
Hórreo, 63. 15702. Santiago de Compostela. Telf. 981 55 13 00. Fax. 981 55 14 25

Dep. Leg. C-155-1982. ISSN 1133-2727